

海

國

圖

志

海國圖志目錄

外大西洋墨利加洲  
卽彌利堅洲

卷五十九

墨利加洲總記  
原無今補

彌利堅國總記上  
原無今補

卷六十

彌利堅國總記中

卷六十一

彌利堅國總記下

外大西洋墨利加洲總敘

嗚呼、彌利堅國、非有雄材梟傑之王也、渙散二十七部落、渙散數十萬黔首、憤於無道之虎狼、英吉利同仇一倡、不約成城、堅壁清野、絕其饌道、遂走強敵、盡復故疆、可不謂武乎、創開北墨利加者、佛蘭西、而英夷橫擡之、憤逐英夷者、彌利堅、而佛蘭西助之、故彌與佛世比、而仇英夷、英夷遂不敢報復、遠交近攻、可不謂智乎、二十七部、酋分東西二路、而公舉一大酋總攝之、匪惟不世及、且不四載、卽受代、一變古今官家之局、而人心翕然、

可不謂公平議事聽訟選官舉賢皆自下始眾可可之  
眾否否之眾好好之眾惡惡之三占從二舍獨狗同卽  
在下預議之人亦先由公舉可不謂周乎中國以茶葉  
大黃歲數百萬濟外夷之命英夷乃以鴉片歲數千萬  
竭中國之脂惟彌利堅國鄰南洲金礦充溢故以貨易  
貨外尙歲運金銀百數十萬以裨中國之幣可不謂富  
乎富且強不橫凌小國不桀驁中國且遇義憤請效馳  
驅可不謂誼乎故不悉敵勢不可以行軍不悉夷情不  
可以籌遠魏源又曰彌利堅與英夷所據皆北洲其南

則最大者爲宇露國起赤道南三度至赤道南四十一度大小數十部廣袤萬餘里國中金銀銅極多國王宮殿皆以黃金爲板飾之惟鐵最少最貴其道路自國都以達四方鑿山平谷更布石爲坦途驛使傳命數里一更三日夜可達二千里其出音各種而別有一正音可達萬里之外與中國官語相等非西洋國國殊音之比故與南洲之彌利堅皆墨利加之二大雄邦也烏乎八荒以外存而不論烏知宇宙之大哉

海國圖志卷五十九

外大西洋

北墨利加

邵陽魏源重輯

墨利加洲沿革總說

原本無今補

此洲明代始有聞故前史無可考今述沿革自明

代西人之書始

職方外紀曰亞墨利加第四大州總名也地分南北中  
有一峽相連峽南曰南亞墨利加南起墨瓦蠟泥海峽  
南極出地五十二度北至加納達北極出地十度半西  
起二百八十六度東至三百五十五度峽北曰北亞墨

利加南起加納達南極出地十度半北至冰海北極出  
地度數未詳西起一百八十度東盡福島三百六十度  
地方極廣平分天下之半初西土僅知有亞細亞歐邏  
巴利未亞三大州於大地全體中止得什三餘什七悉  
云是海至百年前西國有一大臣名閣龍者素深於格  
物窮理之學又生平講習行海之法居常自念天主教  
生天地本爲人生據所傳聞海多於地天主愛人之意  
恐不其然畢竟三州之外海中尙應有地又慮海外有  
國聲教不通沈于惡俗更當遣出尋求廣行化誨于是

天主默啟其衷一日行游西海嗅海中氣味忽有省悟  
謂此非海水之氣乃土地之氣也自此以西必有人烟  
國土矣因聞諸國王資以舟航糧糗器具貨財且與將  
卒以防寇盜珍寶以備交易閣龍遂率眾出海展轉數  
月茫茫無得路既危險復生疾病從人咸怨欲還閣龍  
志意堅決只促令前行忽一日船上望樓中人大聲言  
有地矣眾共歡喜頌謝天主亟取道前行果至一地初  
時未敢登岸因土人未嘗航海亦但知有本處不知海  
外復有人物且彼國之舟向不用帆乍見海船既大又



駕風帆迅疾發大礮如雷咸相詫異或疑天神或謂海怪皆驚竄奔逸莫敢前舟人無計與通偶一女子在近因遺之美物錦衣金寶裝飾及玩好器具而縱之歸明日其父母同眾來觀又與之寶貨土人大悅遂款留西客與地作屋以便往來閣龍命來人一半留彼一半還報國王致其物產其明年國王又命載百穀百果之種併攜農師巧匠往教其地人情益喜居數年頗得曲折然猶滯在一隅其後又有墨利哥者至歐羅巴西南海尋得赤道以南之大地卽以其名名之故曰南墨利加

數年之後，又有一人名哥爾德斯國王，仍賜海舶，命往西北尋訪，復得大地，在赤道以北，卽北墨利加，其地從來無馬，土人莫識其狀，適舟人乘馬登岸，彼中人見之大驚，以爲人馬合爲一體，疑獸非獸，疑人非人，但齎兩種物至，一是雞豚食物等云，爾若人類，則享此，一是香花鳥羽等云，爾若天神，則享此，旣而嘗其食物，方明是人，從此往來不絕，其中大國，與歐羅巴，餽遺相通，西土國王，亦命教中掌教諸士，至彼勸人爲善，數十年來，相沿惡俗，稍稍更變，其國在南墨利加者，有字露，有伯西。

爾有智加、有金加、西蠟、南北相連處、有宇革單、加達納、在北、墨利加者、有墨是、可有花地、有新拂郎察、有拔革老、有農地、有寄未利、有新亞比俺、有加里伏爾尼、有西北諸蠻方、其外有諸島、總名墨利加島云。

貿易通志曰、默利加內地、自昔荒蕪、人迹罕到、草木暢茂、禽獸繁殖、土人遊牧射獵爲生、自歐羅巴商舟往彼、墾地通市、商民雲集、物產殷阜、技藝日廣、教化日興、每月統紀傳曰、亞墨利加南至冰海、北至冰海、西至大洋、東至大西洋、西北庶與亞細亞相連、只隔峽也、南極

出地五十五度五十九分北極出地八十度有餘自此  
更南更北因水如嶽船不能到故不知其度數西出地  
偏西一百六十八度一十八分東出地偏西三十四度  
五十四分

美理哥國志略曰美理哥洲處於極西自古無有海外  
之人至此地者直至明代西洋明理之士遙思地圓如  
球東西二方未必遂無土地於是有伊大理人名哥倫  
布稟其國王求發船以往國王不允復求於葡萄牙國  
王亦不允復連稟西班牙國王延至八年始蒙許之以

海國圖志卷三  
大船一隻、小船二隻、共百餘人、於宏治五年八月初、向西啓行、二十餘日、不見厓岸、同舟水手、防致絕糧、皆欲返棹、船督哥倫布、再三勸勉、後漸見空中有鳥、遠有堤岸、由是用千里鏡而遠眺、乍見人煙、鼓棹前驅、船至傍岸、手執小旗、禱謝上帝、眾皆托足、在此過冬、明年舟旋返國、迨宏治十年、復有船主亞美理哥至此、久駐、故後人卽以其名名此地焉、正德年間、有歐羅巴人解纜西行、先到美理哥洲、而後過亞細亞之中華之印度、又過利未亞、以還歐羅巴、亦有解纜東行、先過利未亞、再過

印度過中華而後西至美理哥洲以返歐羅巴可知自西而東自東而西皆圓圓如球明矣初有葡萄牙人名嘉奴者稟請發船五隻東行旋繞至西圓地而返返之日王賜以銀鑄小地球上刻字云始圓地而旋者其嘉奴乎今則海道益習洋船自東往西或由西返東圓地而返計不過八九月之間即可周行全地皆前人開創之功也美理哥地又分南北二方廣闊相似中有狹地相連南北二方所屬各有數國北方之極處則屬英吉利鄂羅斯二國但其腹地則爲美理哥兼攝邦國焉有美

理哥國全圖  
惜未之見

萬國地里全圖曰亞默利加大地自北七十度袤至五十六度長二萬七千里其大地分兩方一南一北由巴那馬微地相連南至大南海北及冰海東至大西洋海西及大洋海一帶高山綿亘直至海邊嶽岑嵬嶷在南方層崗疊嶽高接雲霓四山之中高峯百七十丈其山之左右南北廣坦袤延圓方六十萬有餘方里地雖浩瀚非亞非沙漠之比江河疏通支灌草木豐茂其高敞之地高於海六十丈似亞齊亞土沃民饒產物豐美如

曰糖加菲橙柑等菓由他國而移種者及牛馬羊等五畜亦由異國運至而孳生者民分四族曰土人乃原始所駐者曰白面之氓由歐列國來者曰黑民之人由亞非利加買來者此等族類互相結親其居民似中國然其行藏動止殊異至白面之族大半英吉利是班牙葡萄牙三國之後裔古時亞默國隔重海與歐列國無往來其土民不知耕田但知游獵林內尙有幾國顏狀慈善性情敦讓但毫不識字又不知農惟待天生地產於明朝年間歐列國專務尋新地以開商路於是智士名



曰可倫奏請是班牙國王兵船望西而駛於明孝宗四年得到其地知山內藏金不少據獲其土金玉山積遇有葡萄牙船被風飄到南方亦守其新地是時英國亦調船航海而抵亞默利加北方其佛蘭西亦據編少之地此四國占據大地惟是班牙國之藩屬最延不下歐羅巴之列國也歷三百年忽於乾隆四十年間入英國版圖之士氓齊心奮勇與英死戰而自立國於道光年間是班牙之新地逐一效尤驅其舊主而各自專制此次尙存數島以及英國北地今陳其列國風俗之滄漓

民人之利病疆域之大小山川之形勢戶口田賦兵防學校之盛衰逐一詳述之

又曰北默利加冰海周繞北極沿海墘灣石山巉峙天氣最寒夏亦飛雪秋先結冰冬月全係長夜星露滿天五六月間則太陽不落其冰漸消浮於海面若疊山然列西國冒危連年調船前往其境幸到北極者厚許賞給此等船冬停冰中不動水手以雪蓋船每年英吉利荷蘭等國駕船遍駛以捕鯨魚海犬海馬等獸煮肉而收其油夏時各國巡船百餘所獲鯨魚及骨價銀計二

百萬有餘兩，但百千水手，或覆舟，或被鯨拉溺深淵，好利習危，不顧生命。此海魚鼈無數，居戶捕以爲食，而衣海犬之皮，穴處土中，人甚矮陋。冬時晝夜燒油自照。此處亞齊亞及亞默利加，惟隔海峽，故俄羅斯國由其藩屬遷此以捕貂鼠海虎之毳獸。

地球圖說：北亞美利駕大洲，東界大西洋，南西兩面界大東洋，北界北冰洋，百姓共三千零七十五萬之數。洲北地近北極，故凡沿冰洋之處，當地地球偏北，天氣極寒，惟夏月太陽不隱，冰雪始消，漫浮於海，如疊山岳，舟觸

之者立摧破其南方地當熱道則天又極暑矣。溯三百六十五年前各國尙不知有此大洲。明朝宏治間意大里國有一智士名可倫波遍謁國王願借船覓地均不信。從後大呂宋信從其言駕船至彼果得是洲。且山內金銀充物惜遠隔重洋與歐羅巴列國無往來之禮不知耕讀與木石居與禽獸伍好逸惡勞食天生之果以後英吉利佛蘭西大呂宋三國之人相踵而至繁衍不絕瓜分爲屬。義羅斯國人聞之亦徙民於茲而割據屬地焉。至中國乾隆四十年間是洲之民不甘屬英兩相

決戰自立爲花旗國號自主其地又是洲之南係大呂宋所屬今亦兩相決戰定爲麥西可國但洲內尙有各種屬國卽峇羅斯屬國埭尼屬國英吉利屬國花旗國麥西可國跨氏馬刺國是也

又曰南亞美利駕大洲東南北三面都界大西洋西界大東洋百姓約千六百萬之數是洲在昔本係英吉利佛蘭西大呂宋葡萄牙亞荷蘭五國管轄悉自立爲國惟國之小者力不能自樹仍爲荷蘭英吉利佛蘭西三國瓜分所屬洲內之國一曰可倫比二曰器亞那三曰比

魯

又名四口被西巴

五曰波利非亞六曰智理

又名治理

七曰伯大加宜八曰育奈士迭國大半天主教小半耶

蘇教洲內多高山而土地平坦有三大江曰亞脉松江

阿利挪加江伯拉達江亞脉松之江其大甲於天下洲

東有極大曠野林木參天綿延萬里內多猛獸大蛇野

馬野牛駝鳥土產金銀馬口鐵水銀金銅鑽煤炭珍珠

銅藥材木料五穀白饴鳥獸皮等洲之西有一帶高山

名安地師計二千一百四十四丈折里得十二里計長

五千四百里中有火山不時地震

外國史略曰亞默利加大地分南北兩州中隔東西海  
港以巴那馬一峽相連廣袤方圓七十五萬里南及大  
南洋北至冰海東及大西洋西及大東洋北極出地自  
七十二度及南極五十六度偏西自三十五度及一百  
七十度長約三千六百里最廣之處橫闊一千零六十  
里惟巴那馬地甚窄闊只六里在南北二洲之間其西  
面皆山其東面亦有山連延不絕北半地有三角之形  
廣袤三十四萬五千里居民二千五百萬有大湖長河  
長江東邊海隅西邊皆山地磽多沙石所有各湖廣袤

四千六百里。義羅斯及英藩屬花旗麥西哥等國俱在南北兩地內。西海隅有大西洋之羣島。南半地廣袤方圓三十五萬里。形狀亦似三角。沿海之山距海濱十五里。自南地嘴延及巴那馬。高有三千三百丈者。上永積雪。內有火山四十餘。地頻震。火山出火漿爲硫磺。東方平坦。其山出白金黃金白銅各寶。此州各國曰巴他義尼曰拉八他曰治利曰烏路危曰巴拉危涯曰破利威曰北路曰巴悉曰危亞那曰可倫比等國。及列西國之藩屬地。此地與歐羅巴各國自古無往來。有是班牙國



智士名可倫者通地理默思地既圓體東半球既有地西半球亦當有地因請於國王航海往訪望西而駛浩無涯岸從人皆欲退可倫銳志前行屆期抵一大洲可倫上岸見居民馴良皆以金飾身問知其來處遂據此地開礦回報國人來者益眾於是此州名揚海外又或過巴那國峽而據北路各金銀山獲寶千萬是州廣大之地盡歸是班亞國爲藩屬人戶雖罕財寶極盛後有葡萄牙國之船到巴悉國據其地英人亦於此亞默利加據麥西哥金銀之山開墾佛蘭西荷蘭大呢等國亦

從其後分據各地皆較是班亞所屬地甚爲狹小于是  
歐羅巴各國互相爭奪連三百年乾隆三十七年英國  
藩屬之民因增餉肇衅佛蘭西是班亞荷蘭兼助之英  
人於四十六年議和由是聽其自主不爲藩屬卽今育  
奈士迭國中國所稱花旗國也嗣後是班亞於嘉慶年  
間與佛蘭西交戰不息所有藩屬亦皆叛之各自立爲  
列國

地理備考曰亞美加州卽所稱新域是也中分兩區界  
枕四海版輿亞于亞細亞州水道之多甲於天下土腴

產豐人烟稠密地氣互異

亞美里加州自緯度北七十一度起至南五十四度止  
經度自巴黎斯午線西三十六度起至一百七十度止  
本州之地四面枕海東至亞德蘭的海西至大海暨白  
令海峽南至南海北至冰海

本州有外海內海外海者東亞德蘭的海西平海又名  
大海南南海北冰海四面環繞並皆相通內海者東安  
的列斯海西白令海北巴非英阿德孫二海各自爲匯  
不相通達

江河之長本州爲最在南者尤甚于北其較大者南北約十有二曰馬拉良乃江河之首也曰科勒諾哥曰多于定曰桑方濟各曰銀河皆注于大西洋海曰馬達勤那注于安的列斯海是爲南河之最曰馬更些注于冰海曰桑羅稜索曰德拉瓦勒曰波多馬哥皆注于大西洋海曰米西西卑曰北河皆注于美詩哥海灣是爲北河之最

本州之湖最盛北區尤甚每有因陰雨漲溢汎濫國中北區湖之大者曰意斯哥拉窩在新北勒達尼亞地曰

蘇卑里的爾曰米濟安曰呼倫曰厄列曰烏達里約皆在花旗國之北曰尼加拉瓜在瓜的馬拉國南區湖之大者曰馬加來波在哥倫比亞國曰的加在北盧國曰詩拉卽斯在北盧巴拉西利二國之間曰巴德斯在巴拉西利國之南其餘小湖不序

本州海島甚多有一島一名者有數島同名者曰日美斯曰蘇登波敦皆在阿德孫海曰德拉諾瓦曰桑諾漢曰安的斯哥第曰迷給倫皆在桑羅稜索海灣曰北爾慕達斯曰耶加皆在亞德蘭的海曰盧加亞曰巴合馬

曰盧加亞曰新波羅委連西亞曰桑薩瓦多曰大安的  
列斯曰古巴曰稜買加曰桑都名額斯曰波爾多黎各  
曰小安的列斯曰德森達的曰馬爾的尼各曰瓜德盧  
卑曰多米尼各曰馬爾巴德曰安的各阿曰三達古盧  
斯皆在亞德蘭的與安的列斯二海之間一名發爾哥  
蘭曰諾委日耳曰馬加連義斯皆在南海曰濟羅哀曰  
若漢發爾難得斯曰亞拉巴額曰勒委列黎曰多曰瓜  
達拉曰王古委爾曰昔德加曰哥的亞各皆在大海曰  
加拉爾哥曰桑馬羅斯曰桑保羅曰桑若爾曰曰亞稜

德斯皆在白令海

本州徑地居七其著名大徑一名曰巴那馬爲南北二區相通之路

本州平原覃廣其在馬更些米西西北二河之間者地面積方約有三百三十七萬五千里其在南方者地面積方約有二百六十五萬里其在安得斯山巴拉西利各山亞德蘭的海暨馬加連義斯峽之間者名曰銀河平原地面積方約有一百六十八萬七千五百里其在加給大河濱至科勒諾哥河口者地面積方約有三十

六萬二千五百里其較小者不及備載

本州荒野次于亞細亞亞非里加二州之廣而磽瘠則同之一在北盧濟利二國之間一在北盧國海濱乃其較大者也

本州地氣南北互異其南方夏暑與北方冬寒均甚于歐羅巴州寒道嚴冷南北皆然物產維艱人多寒疾溫道炎熱西南爲甚熱道溫和不似亞非里加州之酷烈爲人物所難堪者則本州未之有也

金銀之多本州中熱道爲最他州莫及至于銅鐵錫鉛



以及水銀石類等項靡弗備具至於飛潛動植他州所有者此皆蕃育

本州人民約計五京九兆餘口

本州原屬古教自歐羅巴州人前來居住始有奉耶蘇之教迄今奉古教者三十分之一但所奉耶蘇之教名目各殊曰公教曰脩教曰路得羅曰加爾威諾曰厄肋西亞國教各從所尙趣向不同又有奉大秦古教者本州各國多有不設君位立官宰理有黎庶公舉者有歷代相傳者至于歐羅巴州兼攝各國照藩屬之例

本州技藝與歐羅巴州技藝相同蓋三百年來自英吉利佛蘭西亞里曼等國來居之後所有技藝靡弗相授因得工作精巧織紡佳美然各國中惟花旗國爲魁百工製造俱與歐羅巴州精巧相等其美詩哥北盧哥倫比亞濟利巴拉西利等國則次之然巴拉西利等處仍屬精巧

本州分建各國曰育奈士迭國亦曰彌利堅國亦曰花旗國皆外人名之也曰美詩哥曰德沙曰瓜的馬拉曰桑薩瓦多曰開都勒斯曰尼加拉瓜曰哥斯德爾黎加

曰新加拉那大曰厄瓜爾多曰委內瑞辣曰北盧曰波里維亞曰濟利曰巴拉大河花旗國曰巴拉乖曰烏拉乖曰巴拉西利曰海地其歐羅巴州之英吉利呂宋佛蘭西賀蘭低那馬爾加厄羅斯瑞西亞等國兼攝之地暨巴達科尼亞部落分序於後

本州落機大山猶亞細亞之昆侖縣巨極南北爲本州各山之主殆無與匹敵者矣

彌利堅卽美里哥國總記上

美里哥國志略曰園地周圍三百六一度以天測地則

美理哥地屬七十餘度中國亦屬七十餘度若以南北  
圍地而計周圍亦三百六十度內三十餘度屬美理哥  
國三十餘度屬中國中國之京城與北極相去不過五  
十度而美理哥國之都城與北極相去亦不過五十二  
度所以美理哥國之北甚寒而中國之北亦然自赤道  
至中國之南相去不過二十度而美理哥之南至赤道  
亦不過相去二十九度中國之東有大洋而美理哥之  
東亦然可知二地東南北皆無異惟中國之西皆列國  
爲交界而美理哥西則茫茫無際焉美理哥北有英吉

利附庸之國南有墨息哥國案墨息卽墨西哥科亦作墨是可東有歷

瀾的海西有太平海然以普天下分爲二十一分而兼

攝邦國僅屬一分矣原夫創國之始卽有伊大里法蘭

西西班雅英吉利荷蘭等國人迢遞而至貿易至今不

過三四百年外國至者亦年來年返後見其無國主民

散俗樸無不欲奪其土地適值年荒民多就食於別國

勢益渙散各國遂加之以師旅新國不能自立迨明萬

歷年間有英吉利人稟其女王請開新國遂創費治彌

亞之地及占士王遂建城令七人管治內一人爲首六

人助之大小文武官吏任其選用以王名名之曰占士  
城其後泰昌年間英吉利王嚴諭庶民奉上帝者盡一  
同歸波羅士特教不得任意奉額利教加特力教違者  
加刑由是國人願請徙居新國者二三百人蓋奉加特  
力教欲隨意事上帝也初至北方玳瑁某之地卽以此  
名新洲後又名之曰新英吉利時有土人頭目名馬沙  
雪厚待英吉利人爲之地主其後分茅列土有馬沙諸  
些部蓋爲此頭目而名也自泰昌天啓間英人到新國  
者三千餘人因人眾始分居新韓賽羅底島緬部等地

惟總名則曰新英吉利矣。前英吉利人至新方者，特欲得隨意奉教，故一至後，卽起殿堂以事上帝，設官職立學校。萬歷年間，有荷蘭人至新地之南方，名其地曰新荷蘭。其後康熙三年，英吉利人逐荷蘭，改其地名曰新約基。崇禎年間，新荷蘭之南有瑞典人居此，名之曰新遮些。其南亦有瑞典人居其地，稱曰底拉華。旣而皆爲荷蘭人奪之。英吉利又逐新荷蘭而盡有其地。康熙二十年間，有英吉利人衛廉邊者，其父前爲水師帥，禽賊極多，王賜以金不受，求賜一新地。於是王授以印信而

往名其地曰邊西耳文也

邊者姓也西耳文者野地也謂邊姓之野地也崇禎

五年有英吉利人稟女王欲居新國之極南遂名其地

曰馬理蘭

馬理者后也蘭者地也謂王后所賜地也

順治五年有英吉利人

至新方費治彌亞之南稱其地曰駕羅連內又分南北

二部自萬歷年間始有費治彌亞部及雍正十年始有

磋治亞部越百數十年後漸次而有十三部也

其一費治彌亞

其二馬沙諸些其三羅底島其四新韓賽其五千尼底

吉其六新約基其七新遮些其八底拉華其九邊西耳

文十馬理蘭十一南駕羅連十三部人口共約百數十

十二北駕羅連十三磋治亞

萬各部首領皆由英吉利國除授而以英吉利國例治



之維時有法蘭西國人亦開墾新地之北名爲新法蘭  
西後亦名干那大於是漸次自北而西而南皆有民居  
建礮臺意以防虞新英吉利人也由是英吉利鎮守費  
治彌亞之總制脩書於法蘭西之將軍令毋庸多設礮  
臺法蘭西將軍不允其往來傳信者則本地人華盛頓  
也於是總制傳檄鄰部並奏於王於康熙二十年王遣  
大將率兵船數十軍兵數千至費治彌亞交戰三載勝  
負未分迨二十四年法蘭西之大將曰滿鑒英吉利大  
將曰吳里富對壘於貴壁兩將皆受礮傷回營皆死旋

英吉利取勝於是逐客民毀礮臺奪其土爲附庸於康熙二十五年班師回國此英吉利初據美理哥地之原始也自康熙二十五年干戈既息又數十載至乾隆間齒日繁田日闢貿易日盛英吉利王之心日侈遂欲加重稅餉屢與人勒爭時英吉利有公司商船自中國販茶回西國例賣貨者納稅英吉利王改諭令買茶者納之土人不服於是南駕羅連部則相約不買公司之茶囤積二三年變爲廢物費治彌亞與新約基之茶船皆被驅逐不許進口而波士頓之茶夜爲土人投諸海於

是新國人互相傳約、英國若征、買稅者、我國一人亦不許買、英吉利王大怒、遣兵至新國、將別項餉稅皆強勒倍收、民死不肯從、時乾隆三十九年、新國各部眾矜耆至費治彌亞會議、欲客民與土民仍前和好、復其舊制、收回新令、於是稟王請不加征稅餉、并撤兵回國、英吉利王不聽、反增兵艘入境、掠貨船、焚垣壁、國人弗忍其虐、如是矜耆復議、密約各部、落皆出壯丁、整戰艦、立華盛頓爲帥、於乾隆四十一年七月初四日、檄告各國曰、上帝生民、萬族同體、各異性命、使安其分、又恐民之強

凌弱眾虐寡蠶頑之無教故又立國主以範園之扶植  
之非使其朘削之也我國舊無渠長及英吉利來王我  
地臣我民我民亦懽然而奉之曰庶覆幬我乎庶不災  
癘我乎然其政非甚有害則民尙可忍而不變乃英吉  
利王之凌虐我國一而再再而三我眾亦忍至經年屢  
月而英吉利王終無悛悔其勢不可再坐視矣故不得  
不議立首領備兵甲以自扶傾而救危至英吉利王凌  
虐我國之事各國或不盡知今條列十二端告白天下  
知變動非我之罪

一舊例增改律例、須與國中衿耆合議、從民之願、乃英吉利王徑改新例、不與衿耆相議、及新例不便、再三稟改、不允所請、

一每歲各部衿耆、來集會城、欲至議事廳、商酌一切、英吉利王乃驅逐之、既逐散後、不許復聚商議、

一土曠人稀、原望歐羅巴各國人至、庶農商日盛、乃英吉利王禁止各國之人入境、不欲戶口日繁、惟英人獨擅其地、

一舊例本處理刑官、或先由衿耆選舉、或先由王擇定、

再采公議茲英吉利王自專不令衿耆預聞

一舊例各部文武官各有定額俸祿皆出自民乃英吉利王擅加官額派民供給不與衿耆同商

一舊例各省弁兵亦有定數糧餉亦出自民茲英吉利王擅自增設調派糧餉亦不商之衿耆

一舊例文武員弁或本土或外人不定有事必文武同議英吉利王不然武員則必專用蘭墩人有事不與文員商議惟武員擅權任武而不任文

一英吉利王刻剝錢糧多於前制禁停貿易大異常規

民之所欲必違之、民之所患必興之、專以厲下而奉上、刻他國之人、以私己國之人、

一英吉利王所調各水路巡兵、惟有刼掠貨船、及毀折城池、縱焚房屋、奉此爲王、與奉寇仇何異、

一英吉利王使弁兵常居民舍、以便時行欺侮、

一被刼之良民、勒令從其爲賊、往刼別艘、如有不從、卽行加害、

一英吉利大官、諭唆各部、使自紛爭、並唆土蠻、使害居民、使各不相安、

以上各事我國衿耆屢諫而英吉利王不聽國人無如  
之何、不得不自創立邦國、新國旣立、英吉利王亦其  
如我何、

英吉利王見檄、知十三部合爲一國、益怒、復增兵船入  
境、新國拒戰、經年、勝負未分、又得法蘭西國人出兵相  
助、于是彼此鏖戰、六七年之久、時三國戰艦百十艘、將  
士數十萬、陣亡者固不勝數、乾隆四十九年、英吉利王  
知新國終不可勝、乃遣大臣來西講和、結盟罷兵、國中  
衿耆議曰、我國之兵皆民也、今旣相和、則眾兵盡散、棄



甲歸農法蘭西兵船亦返華盛頓亦歸田里矣倘英國再敗盟興師何以備之且國中有訟獄誰爲處斷必立君長定法制乃可久安長治立君而繼嗣不賢或至暴虐國亦終亂將何以善後于是乾隆五十三年春各省矜耆會議于費治彌亞共推華盛頓爲首身後公舉賢者更代不世及不久任議四月畢及散歸各執所議章程回告部內之人再議一年復至費治彌亞再議然後定並公舉文武各員其戰陣所費公項尙缺二十餘萬以每年所收之餉漸次償補乾隆五十九年計新國之

民不過三百九十二萬一千三百二十五口內爲奴者  
六十九萬五千六百五十五口是年其征收餉銀四百  
七十七萬一千員時尙無都城矜耆共議欲買費治彌  
亞與馬理蘭交界之頗多麥河周圍三十五里以築都  
城其河口至城之地約有百餘里由是國內規模律例  
已備乃立與鄰國相通之制以絕後世邊釁令民視四  
海如一家視異國同一體遇列國紛爭勸和爲尙此與  
歐羅巴內法蘭西荷蘭瑞典英吉利葡萄牙西班牙鄂  
羅斯大尼阿理曼等國及亞非利加洲內麻哥安遮耳

都尼士等國亞細亞內都耳基

即都魯機阿黎米白頭暹羅

等國相通各國皆有使至獨大清粵東則無惟有貿易領事商人來往而已此新國建立之本始也

國制首領之位以四年爲限華盛頓在位二次始末八年傳與阿丹士時歐羅巴內有法蘭西國奪新國貨船新國遂設艦艚兵士復請華盛頓爲帥二年然後事靖嘉慶五年華盛頓卒國人呼之曰國父以其有大勳勞於國故也

按康熙二十年英吉利與佛蘭西爭議時已稱華盛頓往來其間彼時年至少亦必二十

外至乾隆四十年新國起兵拒英吉利時華盛頓爲帥已相距百二十餘歲矣若嘉慶五年始卒則百四十餘

歲矣蓋二人同名非一人也嘉慶六年間阿丹士在位四年傳與遮  
費遜其時戶口有五百三十一萬九千七百六十二丁  
遮費遜在位八年遂傳與馬底遜迨至嘉慶十七年歐  
羅巴內列國干戈未息時英吉利梢人不足用乃捉新  
國船上稍人以補之於是兩國復相關二年後始靖嘉  
慶二十二年馬底遜在位八年傳與滿羅滿羅在位八  
年傳與阿丹士之子阿丹士之子在位四年傳與查其  
遜計至道光十七年春正月二十八日彼國則二月初四日也則  
在位八年今又傳位與泛標倫矣立首領設國法之時

止有十三部

兄弟三章

至乾隆五十六年增華滿部五十七

年、建大基部、嘉慶元年增典尼西部、七年增阿噶阿部、

十九年增累斯安部、二十年增引底安部、二十一年增

美士細比部、二十二年增伊理奈部、二十三年增亞喇

罷麻部、二十四年增緬部、二十五年增美蘇里部、道光

十六年增美是干及阿干蘇部、通計二十六部、戶口約

有千三百餘萬矣、

部落之名即本書中亦多不同本無定字

新國中原無亞細亞內中華日本暹羅越南各國人至

惟有歐羅巴內伊大理法蘭西荷蘭英吉利西班牙雅瑞

典等國之人而已各國亦不過年來年返其久同處者  
惟英吉利爲多故新國人物規模體制皆不異於英吉  
利其後法蘭西荷蘭等國三五成羣而居由是新國戶  
口日盛一日康熙二十八年約有十二萬丁乾隆二十  
一年約百萬丁乾隆四十年約三百萬丁乾隆五十五  
年計三百九十二萬一千三百二十八丁前未設計戶口之法故舉  
大數而言至此而始嘉慶五年五百三十一萬六千五  
立十年一計之法也百七十七丁嘉慶十五年七百二十三萬九千九百零  
三丁嘉慶二十五年九百六十三萬八千一百八十一

丁道光十年一千二百八十六萬六千九百二十丁

內

奴者約二百萬生齒雖日繁終未憂人稠地狹中華已過三萬

萬況新國之未過一千三百萬者乎近見英吉利國著

書稱美利哥國原是英吉利罪人充軍至此所衍苗裔

其言荒謬無稽之甚不過英吉利人遷於喬木矣惟其

風教技藝實賴歐羅巴人始開耳

按英吉利禁奉加特力教之人故加特教

中三百餘人遷往新地而英吉利因造爲罪人流謫之

說以詆彌利堅人其實彌利堅國豈盡此三百餘人之

裔卽此三百餘人亦因不肯改

教而遷他國並非謫戍罪人也

新國地勢共列爲三分東離壓澗的海數十里有亞罷

拉既俺山由南而北其景如畫自山抵海是爲一分西  
離太平海數百里又有治臂外嶺由北而南其形如線  
從嶺抵亞罷拉山亦爲一分自治臂外嶺至西之太平  
海復又爲一分所謂三分也由亞罷拉既俺山之東北  
轉而往南沿海而行漸次廣大其東北角山海相連毫  
無餘地東南則有平陽山河相間山頂有瀑布由基泥  
伯小河下流爲美里麥河干尼底河哈地遜河底拉華  
河蘇貴合拿河頗多麥河羅晏屋河奴細北底河卸番  
亞河其西之治臂外山高約百丈與太平海相隔約千



五百餘里、凡流注於太平海者、無不經過此山、中有一  
美斯細比大河、由北而貫至南、且有美蘇里河、阿噶阿  
河、出墨息哥國海口、其北則有素比里耳湖、美是干湖、  
胡瓏湖、伊里湖、安大里珂湖、磋治湖、汕玳璉湖、南北寒  
暑不同、北方甚寒、愈南愈暑、由南而北、熱亦漸減、田地  
亦然、北地可以依時而耕、南地近水時、患潦浸、北邊界  
與北極相去、不過三十五度、若在北極至國之南界、則  
相去六十五度、在國之南界至南之中赤道、則相去二  
十五度、可知國內之地、三十度無疑矣、以三十度列爲

三分而近北極之一分每歲中有四五月盡是冰雪中  
央一分每歲雪霜漸少近南方之一分陽和晴暖時須  
納涼一年之四時不同每月之寒暑亦異故萬物之生  
產自不齊其大略也欲知土地之美惡必先知寒暑風  
雨之候故設一寒暑針用年月日較之則可知其寒暑  
欲知風信必須以年月日紀之方可知其大略如馬沙  
諸些部之波士頓城每年有北風三十日西風四十九  
日西北風六十四日東北風四十三日東風三十二日  
東南風十六日南風三十七日西南風八十八日在華

盛頓城北風五十六日、西北風八十七日、東北風三十  
五日、東風十六日、東南風二十四日、南風四十日、西南  
風五十五日、西風五十六日、在累斯安部之巴頓而礫  
城十一月內、北風則三十九日、西風七日、東北風十一  
日、東風五十九日、東南風十六日、南風七十一日、西南  
風十五日、西風一百四十六日、土地美惡、亦可知矣、欲  
知雨之多少、須在上年每月日紀、天之星辰、雲霧、考驗  
知之、在馬沙諸些省、波士頓城、每年約有二百二十四  
日天晴、八十四日興雲、三十五日下雨、二十二日降雪、

在華盛頓城每年天晴二百二十二日，興雲五十八日，下雨七十二日，降雪十三日，在累斯安之巴頓而碌城，十一月內，天晴百六十二日，興雲七十六日，下雨九十七日，降雪則無。

世間日用之物無不從地產，而至要者莫如金銀鉛銅鐵錫之類，曩時金礦甚少，邇來始知亞罷拉既俺山之東北，駕羅連，南駕羅連，磋治亞典尼，西亞刺罷麻等部，皆有之，計道光四年所取之金，估價銀不過五千員，五年則一萬七千員，六年二萬員，七年二萬一千員，八年

四萬六千員、九年十四萬員、十年四十萬六千員、十一年五十二萬員、十二年六十七萬八千員、十三年八十六萬八百員、十四年八十九萬八千員、銀與銅及水銀則或有或無、鐵則各處繁多、不勝用、惟錫及各項珍寶甚稀、煤炭則邊西耳文等部、良而且多、其始地曠人稀、樹木叢茂、人只取木而不取煤、今則煙火日繁、樹木不減於前、而煤炭愈旺於昔、鹽則三面煮海、且有山中鹽池、及鹵石亦可爲鹽、更有一山、其水可作藥、中有油氣、竟可燃燈焚物、此乃土產物性之異者也、凡金、銀、鉛、銅、

鐵煤鹽中華例禁不許私開惟西國人人准取樹木約有百三十餘種高者約三丈餘而至高者則莫如橡木間有八九丈者以之作船作柱甚美其木則有四十四樣次則核桃亦有十樣次則楓樹高茂其汁甘可煎糖每年約糖數千石美蘇里部內有一株最大身圍四丈六尺次則樺樹尤壯觀瞻其皮可代瓦蓋屋作舫渡河土人用作小舟輕捷異常出入背負渡水既迅攜帶又便亦有蠶桑以爲綢緞其餘飛潛動植他國所有者新國皆有之

開國之初無知無識不諳工作之事或有人力而無物  
本或有人力物本而無知識皆難成器必三者兼備而  
物始成卽如中華之綢緞磁器既有人力物本又有知  
識何怪其精美如中華之匹頭已有人力知識獨無物  
本何怪其不成至中華之星辰標雖有人力物本而無  
知識亦何所用新國則不然如有物本而無知識則延  
他國知識者以教習或有知識而無物本亦往別國運  
載或有知識物本而無人力則以物力代之如水力火  
力獸力皆是昔新國之南方棉花稀少且一車一機及

一人紡織，成就不易，故棉價最高。迄嘉慶二十年間，國人知識日廣，每地置車數十架，不用人力，而以水力運行，紡數十車之花，以一女兒監之而已。織布每地置機數十張，不用人力，而以水力旋繞，數十機之布，亦惟一小女督工而已。茲有一紡織所，內有紡花車萬五千架，每日能織布四千丈，共計八百人，男一百，女七百，一女每月工銀十二元至二十一元不等，內一總管，理所有出入之買賣，其工銀每年三千元，別有一人總理八百人之事者，其工銀每年二千元，至商主所贏之息，則十



之一已故近日棉價日賤乾隆五十五年前每年棉花  
從未有三萬八千斤者至道光五年間每年多至二萬  
七千萬斤估價銀二千七百萬圓而五分之一在本國  
自用餘皆販賣別國自道光六年間至今棉花日增比  
之二十年前之價則已減三分之二然今之爲商者得  
利反重於二十年前是以織布日多前此多用苧蘿布  
自棉花日增苧蘿日減至大小呢則資羊毛故牧羊者  
亦不少此物始自英吉利而國人效之究不如英吉利  
之精故土人不買本國之呢至今則用水力爲之益巧

益多並流販於別國亦有用人力爲之者留以自用其  
水力爲者則賣與人也若磁器國內雖有其泥惟不能  
制如中華之巧今始略有焉書板則極多皆不用刊板  
而用鉛字活板故鑄字制紙印書三等人甚多

美理哥出商外國者其始極少今已蕃盛乾隆五十五  
年共計外商本利銀一千九百萬員至嘉慶元年則六  
千七百萬員其貨物不過魚油獸皮牛羊猪馬煙棉花  
五穀等類工作則有鐵器磁器木器玻璃器而已國中  
關稅甚少無論入貨出貨皆無重歛然在本國交易者

則不過南洲數國、在歐羅巴洲內、則有英吉利、法蘭西、荷蘭、葡萄牙、西班牙、破魯斯、瑞典、鄂羅斯等國、在亞非利加洲內、則有埃及、多國、在亞細亞洲內、則有都耳基、回回、印度、葛刺巴、小呂宋、暹羅、大清等國、究其初

至、大清則在乾隆四十八年始、由此日盛一日、道光十四年、本國入口船五千六百二十八隻、外國入口船三千九百五十三隻、本國出口船五千八百八十六隻、外國出口船四千零三隻、每年增減皆有冊報、道光十三年、一千八百八十八隻內、大船六十五隻、一所載之

貨道光十四年變價銀約二百餘萬山中之物變價銀約四百五十餘萬屠宰牲口變價銀約有三百餘萬農圃之物變價銀約八百餘萬棉花變價約五千餘萬煙變價約六百五十餘萬工作之器變價約七百餘萬共計變價銀約一萬萬餘通計出口之貨惟棉花爲最道光十五年售出百三十六萬六千五百九十九包十六年百六十三萬六千五百五十九包每包約價銀七十員其銀萬有一千五百五十五萬九千一百三十員上年每包約六十五員本年價稍昂以二年相比則十六

年多於十五年二十七萬包俱在外運回之貨約銀一萬二千五百餘萬員首領最喜貿易日繁故有數欸貨物出入關口毋庸稅餉者

美理哥國有都城之官有各部落之官各部落內一首領一副領議擬人員無定數公選議事者或十餘人或數十人無定各省設一公堂爲首領副領及土人議事之所事無大小必須各官合議然後准行卽不咸允亦須十人中有六人合意然後可行本省之官由本省之民選擇公舉都城內有一統領爲主一副領爲佐正副

統領亦由各人選擇，每省擇二人至都城，合爲議事閣。又選幾人合爲選議處，統領每年收各省餉項，除支貯庫，不得濫用外，每年定例享祿二萬五千圓。若非三十五歲以上及不在本地生者，皆不能任此職。例以四年爲一任期，滿別選。如無賢可代者，公舉復任。若四年未滿，或已身歿，或自解任，則以副統領當之。副統領不願，則推議事閣之首。若亦不願，則以選議處之首護理。設終無人願當此職，則吏政府移文於各部首領，遍示士民，速舉焉。統領三職，文武官皆聽其號令。若遣使於鄰

邦或迎使別國皆統領主之副統領亦由民選舉亦四年一任享祿每年五千圓所司無事不過議事居首而已至議事閣與選議處皆以每年十二月內之初禮拜一日齊集都城公所會議議事閣之職每部有二人計二十六部共五十二人選議處共二百四十三人以議事閣五十二人分爲三等以二年爲期輪退後復擇新者是以每等以六年爲一任不過或先或後而已又定例年未及三十以上者不能當此職議事處則以二十五歲以上爲例二年爲一任期滿別選以十二月初禮

拜之一日齊集會議凡國中農務工作兵丁貿易賞罰  
刑法來往賓使修築基橋之事皆此時議之吏政府首  
領每年俸六千員亦有左右佐事者幾人戶政府如之  
兵政府之首則有幾百人以佐之廉俸亦如之別有水  
師兵部惟專理兵船亦有佐事數十人每年廉俸亦如  
之禮政府不過數人佐之每年廉俸四千圓驛政府總  
理各部落來往文書設驛於各部衝要如有書札寄某  
處則以路之遠近計程費之多寡其銀以每四季包封  
送驛工食銀亦由驛政府發給政府廉俸每年亦六千



圓國之大政有三一則會議制例二則諭眾恪遵三則究問其不遵者是以國都有一察院院內共七人以每年正月齊集究人因何不遵法律之故審畢或二三月然後回家其各部亦分設七院每年以四季齊集究問不守例者但爲審官則不能會議制例會議制例官亦不能兼攝審問也新國制例有五一日國例爲二十六部所通行二曰部落例各部不同三曰府例每府亦不同惟生於斯者守之四曰縣例各縣自立其規各民自遵其制五曰司例亦由司自立惟所屬者遵之此五例

中又小不能犯大如司則不得犯縣例焉國例乃都城  
議事閣會議分發各部今將各大典悉列於左

一歲征糧餉所有動支各項皆於餉內撥發

一國帑不敷必會議預爲籌辦免致臨時拮据

一與各國貿易各部交通卽本土蠻人皆宜同一體

一流民准其寄居入籍以免失所

一設局鑄銀務權衡輕重多寡以歸畫一並嚴禁僞

造番銀

一設驛傳遞公文書信以時修其橋路

一教人習學六藝如六藝中有超眾者則別予獎賞或能自創新制開前人所未及爲今人所樂效者亦獎賞之

一各部立察院以審判民間之事或三部立一或二部立一視部分之大小酌議

一宜防海賊剿劫如有捕獲無論本國外邦必照例治罪或有謀反叛逆及在外國滋事尤必照例嚴辦

一如遭外國欺凌統領必先曉諭萬民倘未便講和

致動干戈，務必踴躍向前。若兩相盟會，即可戢兵。  
一以錢糧招民，爲陸路水路之兵，必嚴核其技勇。  
一水陸兵士，務遵約束，不得騷擾。

一國有攻戰，除國中官兵而外，凡民有肯同仇敵愾者，卽議給口糧。

一專設法以治都城，與治各外部不同。

前例十四條，如有不遵者，則設法以引導之。除此例外，首領亦不能任意自爲。凡統領遇饋送當受者，亦必商之議事閣，及選議處，使大小文武皆得

倣行國人以律例爲重不徒以統領爲尊此外則由各文武自立例款以約束其民但不得以部例犯國例其各府文武各自立例以治因地制宜惟亦不能以府例犯部例耳下至縣司亦如之

立一國之首曰統領其權如國王立各部之首曰首領其權如中國督撫一部中復分中部落若干如知府再分小部落若干如知縣其國都內立六政府如六部尙書惟無工部而有驛部凡公選公舉之權不由上而由下通國水陸兵事則推統領爲主兵有不遵者懲之都

中六政府之首必聽統領選擇副者則由正者擇焉設有升調革降皆請命於統領給文蓋印然後莅任國內刑獄事如察院審判不公統領亦可更正之設與外國相爭外邦求和統領必會議而後定計或外國使來或本國使往皆統領所理也每年各省官會議之際統領將一年收支各項言行各事出示於眾並本年未行各事亦示之於各部官若各部官散後復有要事或與例不符統領不能決者則出示召各官復至議焉所有條例統領必先自遵行如例所禁統領亦斷不敢犯之無

異於庶民而後能爲庶民所服至各部落亦有例其首領初立例時亦如統領自誓卽都內各事亦如統領國內之事府州縣司皆倣此惟部府州道阻且長居縣者或艱於往返故如有事會議亦惟商之於縣也議事人例非二十一歲以上不得預常例以三四月爲期如有要事則無論何月每年議事多少幾次亦無定數前期縣官示諭某日某所公議何事至期耆老通知於眾各將所欲公舉之人書名紙上置甌內後開甌以人多公舉者爲之選官選人之時領事人亦先質於眾或有人

起對請領事自行裁奪則領事再語於眾曰如眾中有  
欲吾選者則舉手爲號如舉手過半者則可如未過半  
則不可又如都中府中州中有要事會議則各縣各應  
選人赴會領事則謂眾云今選人往城會議當令何人  
往眾亦將保薦之人錄名紙上置甌啓甌如前例凡縣  
官之職一則以選人爲首所有縣內一切諸事皆必盡  
知卽非其所管者亦必周知二則在縣內收餉必悉知  
縣內人丁多寡何人有田若干何人有地有屋若干三  
則總理縣主一年收支各數言行各事登錄存檔不能



苟且漏入漏出其外則有總理揭借拋欠偷竊捕盜濟貧等數人如非常任事者則別治生業如常任事者則各有俸祿

國中察院有三管理都城者曰京察院管理二三部落者曰巡按察院管理一部半部者曰分巡察院在都城者衙門共七人一正六副每年正月齊集會審各案一次如有因事不至者四人亦可審不及四人不能審都城之內若有不遵例者亦京察院審之若巡按察院審事不正任其轉告於京察院巡按察院衙門有七其一

管緬新韓賽馬沙諸些、羅底島四部、其二管干尼底吉、  
華滿二部、及新約基之南半部、其三管新遮些部、及邊  
西耳文之東半部、其四管馬理蘭底拉華二部、其五管  
北駕羅連、及費治彌亞之東半部、其六管南駕羅連、  
治亞二部、其七管建大基、典尼西、阿嘻阿三部、惟亞刺  
羅麻累斯安美士細比美蘇理伊理奈、引底安美是干  
新約基之北邊西耳文之西、費治彌亞之西等部、人數  
無幾、故以分巡察院兼理之、惟每巡按察院審事時、如  
無京察院、在則不能審、若有要事、則必有二巡按、而後

可又每年齊集二次審判如此數部內有人在他巡按察院所屬地犯法則卽由巡按察院審之至分巡察院衙門共三十有三每院內一分巡察院每年審事四次若有要事則無定次倘審不公亦可轉告於巡按察院此皆國察院也其外又有數部察院部內犯法則部察院審之府州亦如是凡察院內有各科房各工役以聽差遣凡原告被告有愚蠢者則有人代爲書狀並同上堂代訴人犯既齊察院兼擇本地衿耆以助審衿耆少則十二人多則二十四人除本犯之親友兄弟外卽先

知有此事者亦不能預既審後出而會議遂定曲直眾  
衿耆將情由寫明送呈察院而退察院觀其是非照例  
定罪每縣中亦有地保幾人勸和小事國內立一律例  
院有室數十餘間每間有一師掌教凡進院習讀者以  
三年爲滿皆訓告規條律例使人知遵守

國中犯法大者爲反叛殺人強劫放火立國以來告反  
叛者未之有也殺人則每年多少不定強劫每年終不  
能無放火則二十六部中每年不過五六次其強姦每  
年亦有二三次情姦亦時有之其餘或冒名僞造或竊

盜爲非、或相鬪相爭、或醉後逞凶、今以馬沙諸些一部言之、其犯法監禁者、道光元年、則有七十一人、二年、則八十四人、三年、則九十一人、四年、則一百零七人、五年、則八十六人、六年、則九十六人、七年、則八十一人、八年、則八十人、九年、則百零四人、十年、則七十九人、十一年、則百有十五人、十二年、則七十一人、十三年、則七十六人、十四年、則百有十九人、是年內竊盜者八十八人、冒名偽造者十人、強劫者四人、放火者一人、爭鬪者五人、情姦者六人、強姦者二人、脫逃復捕獲者一人、殺人者

二人以上各年監犯以十四年截計除審後放出監外  
尙存一百七十七人刑法則有三一絞死二則監禁三  
則罰贖並無梟首充軍拷打等刑凡反叛海盜皆絞死  
殺人強姦強劫放火等如之或永監禁焉其餘或監禁  
或罰金隨情輕重各省各府皆有監獄監內左右上下  
皆用大石爲之或數人一房或一人一房皆極潔淨亦  
有小窗通風房外四圍有欄杆餘地可以散步管監官  
體恤其衣食勸戒以善言約束以事業今計道光十五  
年馬沙些監內犯人所作工銀除管監官教師並看門

兵丁等工食並各犯衣食所用外尙存銀七千二百九十六圓盡撥充公

新國之濟貧也未貧預防其貧既貧則防其愈貧如其防火燬則多以磚石疊築並設水車水筒以備不虞防電閃傾頽則立一長鐵杆於門以拒之電見鐵杆即自頂旋繞至杆下而去貧人收作傭工倘無人收用則本縣設濟貧院以居之各分以事業所得之項全數入官倘生子女則有塾師教之府省亦然至會城村族不許有一丐食流離之人然非先立一濟貧之法又安能禁

人之乞食乎凡有國者所宜留意

每鄉設學館一所鄉中富者科銀延師教一鄉子弟若鄉中無富者則在會城中官員處借助其就學之童每夕回家男女皆可以爲師若女師束修銀每月不過六員至十員教女童讀書外並教刺繡男師則二三十員不等亦有專教一家者又有縣中學館有無多少不定惟鄉學館不拘貧富縣學館無束修者不可入因以此項延師故也其館本處人稟縣官而後建或縣官公同建造者亦有之其中所學比之鄉學又略大更有會城



中學館多少無定、城中富者建之、或設會而以會項建之、或官員助之、館中條例、擇幾人議之、並司其事、然後遍告同學、學者每年考試一場、取中者入館內、如中國之秀才、習學以四年爲例、不遵律戒、不待四年、亦可以逐之、旣習四年、則如中國之舉人矣、散館後、或爲官、爲士、爲農、爲工、爲商、而各司其事、別有大學館、惟許已中舉者進焉、所學有三、一聖文、二醫治、三律例、規條二者不可兼得、又以三年爲期、期滿則猶中國之進士矣、會城學館每部一二所不等、三四所不等、惟進部者通融

計算約八九十所，每所延師五位至三十位不等，截長補短，每所約十位，其師每年束修銀一千至三千餘圓不等，受業者每年每位送束修銀一二百圓不等，每館之徒二三百不定，通融牽算，不過百四五十人，分析言之，聖文大學館國內約三四十所，每所師四五位，受業者約七八十人，又醫治大學館約三四十所，每所爲師者約七位，其徒數十人，習律例之館，師徒多寡亦與醫館大同小異。

新國器械與中華異，不但船隻之桅帆槳櫓，卽築屋建

樓鋪設以及兵器皆然火礮能用彈子數十斤手鎗之口則有小劍但無弓箭長矛籐牌而已國人皆好音樂歌唱故有吹彈敲戛各器童蒙卽有樂師教之又有畫地理山水人物花卉鳥獸之工次則雕刻之工又其次則建華屋築高橋等工或有能創新出巧如火輪船及水火織布之類則地方官獎勵之

新國立仁會以濟在監之犯昔監內弊端甚眾由監出之犯爲惡甚於前由是會中遂改各監之規模分布二十六部監內分善惡兩途善者居寬廣之所惡者居淺

狹之所俱不能相見前收監者無事業今則一日不能  
閒並有善書於禮拜日使誦故今之犯法收監者出監  
後卽痛改前非且前此監中所費極多今犯人作工營  
生故每年除支外反有餘貲見一章又聾盲啞者原屬無  
用今國內立仁會設館訓習如聾啞者亦以手調音而  
教之盲者卽有凸字書使他以手揣摩而讀至幼失怙  
恃者亦有育嬰之院若醉酒亂性難以強禁乃設一節  
飲會館內藏一簿登戒飲者姓名願戒不願戒各從其  
便既進戒館後則不能再犯共計各部此館約有四五

千間、其登戒酒簿者約二百萬人、其造酒之舖變爲他項貿易者約四五千間、將酒舖賣人別尋生理者亦約七八千間、故酒費日少、戒飲之人日多、又城中設醫生七十五人、訪察酒之損益、今則皆知其無益而有損、故戒而不飲者大半、至于水手輩多是貧乏之人、故會內亦濟之並及其妻兒也、凡無力延師訓習者、亦設院延師以訓之、國人於禮拜日皆不作工、故設一會所、逢禮拜日教人內藏書極多、如不在者、亦可借回家自習、至禮拜日復送回、又不至學館誦習者、亦延師至家而教、

亦有刊刷小書分贈令人學善者亦有一院專刊聖書  
如無力買者亦可贈之別有一會名曰勸和會如  
兩人相爭或鄰省相鬪兩國不和者勸之每會中所用  
多者每年不過二十萬少者不下數百圓

開闢之始未有人類上帝既造一人爲萬物之主又立  
一女子以配之夫婦之禮自此始歷代相傳無異但無  
立妾及少年預聘之例年十五以上者訪求淑女若非  
親誼則踵府謁其父兄結好往來三五載彼此賢愚皆  
已知之或面訂佳期或各告父母並無奠雁迓輪及聘

定之禮娶之日男女升堂攜手有一官或族正等書二人名蓋之以鈐記印信其後報丁冊內列夫婦姓名自後必終身偕老國中二十六部無君臣之名惟有上下之分國領部領府領縣領之不同各首領起居飲食衣服亦無異平民但事權屬之人人皆敬之而已其兄弟父子朋友三倫與中國略同

新國衣服之制帽高至七八寸不等或以黑絨灰色絨爲之其矮者或圓或六角八角帽前有皮簷一片以遮日光常有帽帶繫之冬寒則以法蘭仁氈爲內衣短小

無領外加一汗衫四圍纏身不甚寬大其領高出至領下有一頸巾繫之其外蓋一背心前夾後單高至頸膊下則用法蘭仁氈爲短小之褲外則蓋大褲汗衫在裏前後有兩鈕扣以十字交加帶過膊弔扣後蓋一長衫四圍纏身光滑無紋袖長至掌領包至枕後前長如背心後長至臀以羊毛氈爲襪長不過膝鞋以牛皮爲之底面皆然但底厚不過五層薄則一層面亦有帶繫之靴亦長不過膝底厚者多上下皆用牛皮穿時以大褲腳蓋之所有衣服鈕扣皆開在正面無左右開也飲食



則每日三餐早膳或飯或麵及肉亦有牛奶雞蛋牛油

茶架菲架菲者將青荳炒焦研末水煎或白滾水冲隔渣自七點鐘至十點各

隨其便惟不多食名曰早餐至一點鐘及五點後所食

則雞豚魚鴨牛羊多用燂炙自割而食並有生菓糖菓

牛奶雞蛋等物或茶或酒合家同一檯檯面用布鋪蓋

後置各物其上男女各一便每人以一碟盛物不用箸

惟用刀叉調羹等隨人暢飽故名大餐晚上六點鐘至

九點不等所食者與早餐同此日用飲食之常規也至

於出外則車馬或一車一馬至四馬不等每年月中並

無節氣每日亦無吉凶惟七日一禮拜而已餘與中國  
無異喪事始死則有一人爲之沐浴止穿一汗衫歛手  
合掌置棺內逾三五日葬焉山地內或以石以鐵以錫  
圍之然後放棺親朋送葬素服不用白而用黑墳之上  
下皆有石碑碑上錄亡者之生辰死忌又圍石欄杆以  
防牛羊踐踏原志序曰予生於美理哥國之馬沙諸此  
部中以地球格之則與中華上下相對焉  
可謂一天一淵也今年三十有七竟得渡海繞地而及  
中華歷見英吉利法蘭西荷蘭西班牙亞利未加羅日  
本中華等國之士與各國之文藝豈不奇哉回憶少年  
在本國舍農業儒登大學之堂者三年始進會城書院  
而肄業於各國古今文史地理天文律例規條四時土  
產悉欲博覽研求以應每歲掌院臨場策考毋得踰等

在內四年文憑給領由是出而進於大院習古聖經女  
亦幸上等三年別換文憑時年二十有八家無內顧遂  
欲遊覽異鄉之風俗兼以予國所見聞傳播異土幸於  
葛留巴新埠麻六甲新嘉坡得逢唐人領略華書七八  
載歎華人不好遠遊至我西國之光采規模杳無聞見  
竟不知海外更有九州或者上帝之啓予心乎將使宣  
而播之聯四海爲一家也不揣固陋創爲漢字地球圖  
及美理哥合省國全圖又以事迹風俗分類略書百條  
而後流入中土或有不恥下觀者其將擊節歎喜乎抑  
拉雜摧燒之乎雖然觀域外之士必不方隅自封而  
笑我已道光十八年歲次戊戌孟夏  
高理文題於新嘉坡之堅夏書院